



Inatsisartunut aalajangiiffigisassatut siunnersuut Naalakkersuisut peqquneqassasut siunnersuuteqaqqullugit eqqussukkanut akitsuutit pillugit Inatsisartut Inatsisaat nr. 19 30. oktober 1992-imeersup allanggortinneqarnissaanik, taamaasillutik kaffinut akitsuutit eqqartorneqartoq § 1, nr. 11 atorunnaarsillugu.

(Inatsisartunut ilaasortaq Jens-Frederik Nielsen, Demokraatit)
(Siullermeerneqarnera)

Inatsisartunut isummerfigisassatut siunnersuut Naalakkersuisut peqquneqassasut siunnersuuteqaqqullugit eqqussukkanut akitsuutit pillugit Inatsisartut Inatsisaat nr. 19 30. oktober 1992-imeersup allanggortinneqarnissaanik, taamaasillutik tiinut akitsuut eqqartorneqartoq § 1, nr. 11 atorunnaarsillugu.

(Inatsisartunut ilaasortaq Jens-Frederik Nielsen, Demokraatit)
(Siullermeerneqarnera)

Inatsisartunut aalajangiiffigisassatut siunnersuut Naalakkersuisut peqquneqassasut siunnersuuteqaqqullugit eqqussukkanut akitsuutit pillugit Inatsisartut Inatsisaat nr. 19 30. oktober 1992-imeersup allanggortinneqarnissaanik, taamaasillutik neqinut akitsuutit eqqartorneqartoq § 1, nr. 13-17 atorunnaarsillugu.

(Inatsisartunut ilaasortaq Jens-Frederik Nielsen, Demokraatit)
(Siullermeerneqarnera)

Inatsisartunut aalajangiiffigisassatut siunnersuut Naalakkersuisut peqquneqassasut siunnersuuteqaqqullugit eqqussukkanut akitsuutit pillugit Inatsisartut Inatsisaata allanggortinneqarnissaanik, taamaasillutik sukkunut, lakridsinut sukkulaatinut il.il. akitsuutit atuutilersinneqartup § 1, nr. 1-2, Inatsisartut Inatsisaanni nr. 23 18. november 2019 atorunnaarsinneqassasut.

(Inatsisartunut ilaasortaq Jens-Frederik Nielsen, Demokraatit)
(Siullermeerneqarnera)

Siullermik Inatsisartunut ilaasortaq Jens-Frederik Nielsen taamatut siunnersuuteqarneranut qutsavigerusuppara, soorunalumi Demokraatiniit tapersersukkatsinnut. Siunnersuutit sinnerlugit aningaasalersorneqarsimapput, taamaaliornerup kingunerissallugu, maani inersuarmi amerlanerussuteqartut ajornaquteqanngitsumik siunnersuutit isummerfigisinnaallugit qulakkeerlugulu, innuttaasut aningaasaateqarnerulernissaat.

Tamanna ajornaquteqartariaqanngilaq. Eqqaamassavarput, ullumikkut naalakkersuisooqatigiit siuttuullutik nilliallutillu nipituulior mata taamani 2019-imi, peqqinnissaq anguniarlugu akitsuutit qaffanneqarneranut annertuunik akerliussutsimik takutitsisoqarmat. Ima paasinarluni, Inuit Ataqaatigiit Naleqqallu pissaaneq



tiguinnarlugu akitsuutit taakku utertissagaat. Neriorsuut taanna uterneqarpoq Inuit Ataqtigiit aquttussaannik qineqqusaarnermi, maanna eqqissillutik Naalakkersuisuni siuttuusunit.

Tamanna tunngavigalugu eqqumiigerujussuarpara, Aningaasaqarnermut Naalakkersuisup akissuteqarnermini siunnersuutit kinguarsaanissarlu toqqarmagu allannguutissatut siunnersuuteqarnermini, taakku piffissaligaanngitsumik kinguartillugit. Naalakkersuisooqatigiit tamanna soorlu soqutigisarissagaluaaraat, tassami partiit taakkorpiaat ersarilluinnartumik isumaqarsimmamata. Isuma taanna takutinneqarsimavoq maani inersuarmi, tusagassiuutini novembarimilu 2019-imi maani Nuummi akerliussutsiminnik takutitsisunut oqalugiarnerni.

Aamma puigussanngilarput, inoqarsimammat Inuit Ataqtigiinnut qanittumik attuumassuteqartunik, akitsuutit qaffanneqarnerannut akerliussutsimik takutitsinissamut aqqqissuusseqataasunik. Aap, taakkunangga ataaseq ullumikkut Inatsisartuni issiavoq.

Taamaattumik tupaallassaqaanga, Inuit Ataqtigiit Naleqqallu aaliangissagaluarpassuk siunnersuutit kinguarsaanissamik Naalakkersuisut innersuussutaat malinniarlugu.

2019-imi akitsuutit qaffanneqarnerata ilaatigut ingerlatsiviit akileraarutaasa appartinneqarnerannut aningaasaliissutinut atorneqartussanut aaliangerneqarput, sulinerlut ilanngaatip eqqunneqarneranut snescooterillu eqqunneqarneranni akitsuutip peerneqarneranut. Ataatsimut isigalugu taakku assigiinngitsut kinguneraat, ilaqutariit nalinginnaalluinnartut qaammatit tamaasa aningaasaateqarnerulernerannik. Taamaattumiguna Demokraatit peqataaffigigaat.

Oqaatigisinnaaqaaralu aalajangiinitsinnut tassunga tunngatillugu suutinneqannginnatta.

Kingumut qiviaruma, taamatut ilaatigut aningaasalersuinissamik toqqaanerput peqqissimissutigaara. Sukkunut akitsuutip qaffanneqarnera kukkuneruvoq. Tamannalu utoqqatsissutigaara. Politikkimippugut aaliangiisartussaalluta, ilaannikkullu ajoraluartumik kukkusunik aaliangiisarpugut. Sukkunut akitsuutip qaffanneqarnera aaliangerneruvoq kukkusoq, uagut Demokraatiniit uuminnga siunnersuuteqarnitsigut aaqqerusutarput. Naatsorsuutigaara, Inuit Ataqtigiit Naleqqallu innuttaasunut neriorsuutitik attatissagaat, taamatullu Inatsisartunut ilaasortap Jens-Frederik Nielsenip siunnersuutaa taperserlugu.

Naalakkersuisut kinguarsaatitut allannguutissatut siunnersuutaata tapersersornera qinersisartunut peqquserlunneruvoq. Taaamaappoq takisuuliuutigisariaqaranilu.

Kaffinut, tiinut neqinullu eqqussuinermi akitsuutip peerneqarnissaanik siunnersuummut ersarilluinnartumut pineqarput, nioqqutissat innuttaasut amerlanersaasa ulluinnarnik atortagaat, tamaat isigalugu kinguneqartussa, siunnersuutit innuttaasut tamaasa kiffaanngissuseqalersillugit namminneerlutik isertitamik sumut atornissaannut aaliangiinissaannut. Qanorluunniit tamanna pitsaasuvoq. Siunnersuutit sinnerlugit aningaasalersorneqarsimapput, taamaattumik naaggaarnissamut tunngavissaqanngilaq.

Taamatut oqaaseqaateqarlutik Demokraatit siunnersuutit siullit akuerineqarnissaat innersuussutigaat Naalakkersuisullu allannguutissatut siunnersuutaat itigartinneqassasoq. Siunnersuutinut paasinninnerput naapertorlugu Aningaasaqarnermut- aamma Akileraartarnermut Ataatsimiititaliamut suliarisassanngorlugu innersuupparput.



DEMOKRAATIT
DEMOKRATERNE